



# Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma : Tir Yimyim

tiryimyim@aolima

tir yimyim

TAPAK 7

Asenoki 'One Nation, One Education'  
ang nungdaker: Arvind Kejriwal

Republican nungi tir atema Donald  
Trump jenjang tajungba



VOL. XX NO. 323 (ADOK 323)

DIMAPUR TENTONÜ (MONDAY)

RONGJUI (SEPTEMBER) 04, 2023

₹ 5.00

## RPP-i Nagaland state sorkar dang pelar

**Dimapur, September 3, 2023 (TYO):** Nagaland Legislative Assembly special session ka nung Uniform Civil Code (UCC) aser Forest Conservation (Amendment) Act 2023 anema ozüing latettsü state sorkari lemtetba pelashishia agizüker ta Rising People's Party (RPP)-i ashi.

"Political party, CSO aser arogo shiaia FCA aser UCC magizüker aser NDPP-BJP teloktepi onük ana anema noktaksü lemtetba ya kanga shitak lir" ta RPP-i sangdong ka nung ashi.

"Naga nung shiaia FCA aser

UCC magizüker aser iba alizüing atema longjemba ajanga Naga nung tsüingda mangatetep liaka asenok ka kuma longjemtetsü teimla angur. Kin teloktem aser arogotemi iba onük ana atema ola adokba atema tenüngsang agütsür" ta parnokisa ashi.

Nagaland ajanga dak sendakba onüktem nungbo state sorkari political party ajak indang tebilemba angadangsüla. Party tem tsüingda tangatetba aser ketdangsübaren nung meputep lir saka Nagaland nung political party shiaia nübertem asoshi inyaker aser iba nung RPP dena lir ta parnokisa metetdaksüogo.

## Dimapur nung Khristantemi Manipur atema sarasademtsüogo INDIA TIR DROUPADI MURMU DANGI JOINT MEMORANDUM KA YOKOGO



Deobar nikongdang Dimapur DDSC stadium nung Manipur nung yimjung aser temeten atema sentong agidang tangokba noksa angur. (Dimapur, Sept. 3, 2023)

**Dimapur, September 3, 2023 (TYO):** Deobar nikongdang Dimapur DDSC stadium nung Manipur nung yimjung aser temeten atema sentong ka agiogo.

Nagaland Joint Christian Forum, Christian Forum Dimapur aser Nagaland Theological Colleges Association külemi yaritepa 'Pursue Peace and Justice' omen nung ajemdaker iba sentong ayonga agi.

Iba sentong nung Dimapur nung amenoka aliba Khristan teloktemi India Tir dangi joint memorandum ka yokogo. Iba shidi nung Manipur tebilemstü atema tangsa mapa inyaksü aser olemtep lia tangatetep kati arutsü

atema lenmang lapoktsütsü mepishiogo.

May 2023 nungi tenzüker Manipur tensa kanga mejungi kümogo aser state nung alirtem tetsübu aser tarendak tia ka nung alir ta parnoki shidi nung shia lir. Parnokisa India Tir dang tenla ki aser tamangba yimsü dak sendakba rejutem raksatsür aliba yanglushitsü aser pei talidak toktür jena aortem tanaben pei pei kidangi meyipa aotsüsa sorkari yariteptsü mepishia metetdaksüogo.

"Nü lenisüba ajanga asen linük tangatetba aser tesayuba nung ajemdaker telatetba ka agitsü tamang akar. Iba ajanga timtem ajurua aliba kintem anisüngzükb dang masü saka asen linük tulu

nung telongjem aser temeyoktep tangatetba tali akangshitsü" ta joint memorandum nungsa shia lir.

Iba sentong nung Forum for Nagaland Reconciliation Convenor Rev. Dr. Wati Aier, Dimapur Baptist Women Union president Khontale Seb aser Nagaland Joint Christian Forum vice president Rev. Dr. N. Paphino nungeri o tatsütsü jemi.

India Tir dangi züluba joint memorandum nung joint memorandum Christian Forum Dimapur, Nagaland Joint Christian Forum, Dimapur Baptist Women Union, Nagaland Theological College Association aser Dimapur Baptist Pastors Fellowship ajanga sign süa lir.

## Congress-i Nagaland nung political affairs committee tentet

**New Delhi, September 3, 2023 (Agencies):** Congress-i Deobarnü Nagaland unit nung political affairs committee (PAC) ka tentetogo aser ketdangpurtem shimshiogo.

Congress Tir Mallikarjun Kharge-i Nagaland unit nung züingsem 13 agi akümba Political Affairs Committee ka tentet aser iba nung NPCC tir S Supongmeren Jamir, K L Chishi, S I Jamir, K Therie aser Hoketo Zhimomi nung dena lir.

PAC nungsa Khriedi Theunuo, VB Lasuh, W Akum Yimchunger, N Yona Konyak, Capt G K Zhimomi, Athang Chongloi, Nillo Rengma aser Lanutemjen Lemtur nung shimogo.

Congress Tir Kharge-isa working president atema Khriedi

Theunuo den vice-presidents pezü shimogo.

Nagaland Pradesh Congress Committee nung treasurer inyaksü atema N Yona Konyak aser general secretaries 5 den spokespersons 2 shimogo.

Maneni Congress Nagaland unit nung züingsem 21 agi akümba Executive Committee ka tentetogo. Iba nung additional ex-officio members pezü dena lir. Parnokji state Youth Congress president; state NSUI president; state Mahila Congress president aser Pradesh Seva Dal chief organiser nung lir.

Congress-isa Nagaland unit nung minority department tekolak inyaksü atema Javed Sarvar shimogo.

## Manipur journalist temi külen tsütsü dang shir osang prokshi: Editors Guild of India

**Guwahati, September 3, 2023 (Agencies):** Manipur nung kin o kin tsüingda rara nung journalist temi külen tsütsü shir osangtem zülü ta Editors' Guild Of India (EGI)-i metetdaksüogo.

Manipur nung kin o kin rara nung media ajanga osang belenshiba atema EGI-i fact-finding mission ka inyakba sülen iba osang metetdaksü.

Manipur nung nübo teimba Meitei nung aser nübo tajemba Kuki-Chin nung tsüingda rara nung media-i tejak repranga mapa inyaksangshir ta ken o aika benokba sülen EGI-i fact-finding mission ka inyaka liasü.

EGI-i züingsem aseme akümba telok ka Manipur-i yok aser parnoki August 7 nungi 10 tashi semdanga liasü. Iba telok nung Seema Guha, Bharat Bhushan aser Sanjay Kapoor nung dena lir.

Imphal Valley nung aliba media outlets ajanga tatalokba osang shitak mebelenshi aser iba ajanga nübertem ozüing alema inyaksü ajungmeso, kechiyong parnoki kin ka pusema aser ka anema osang prokshiba ngutetogo, ta EGI teloki ashi.

Manipur nung media-i osang tai agütsüba, tiyazü sangdongba

aser taila osang belenshiba atema EGI-i bushisüingdang.

"Akhi mapang asübo pei pei editors mesüra local administration, police aser security forces nungi Chiefs of Bureaus ajanga osangtem reprangdangtsü akok saka raratep tiyalong nung ibaji meinyaktet" ta EGI-isa metetdaksü.

"Külen sorkari internet shibangba ajanga tensa tamajungba kümdaksü. Sorkari tongteprateptsü noktanga ajanga journalism nung timtem ajuru kechiyong journalist tem kati ka, pei pei yimozülurtem aser parnok osang angurtem tsüingda osang magiteptet" ta EGI-isa ashi.

"Internet shibangba ajanga media dak kongshi kechiyong osang tongteptsü melii local news bendenba nung tensa indang osang shitak magütsütet" ta parnokisa ashi.

Iba mapang Manipur media ya Meitei media ama kümadok aser parnoki yimozülurtem den külemi tangatetep nung külem otsü ka prokshitsü, oyim kar amshitsü mesüra tatalokba osang karbo mesangdongtsü mulungtepa inyaktep. Iba ya parnoki tensa tamajungba kuma meyoknüba agi

inyak ta parnoki EGI telok dang ashi.

"Iba inyakyim ya Imphal lendenlen telungpur teloktemi kanga bulua mapa inyakba mapang tenzükb liasü. Ajüsüka kin o kin tsüingda rara nung iba ajanga kin ka metenja dang osang prokshi aser journalistic tangatetba maliasü" ta EGI telokisa ashi.

"Meitei aser Kuki nung tsüingda mangatetep mapang internet maliasü aser tongtepratepdak maliba ajanga media-i state sorkari ashiba dang agitsüsa aküm. N Biren Singh-i aniba sorkari ashiba osangji nübo teimba Meitei nung tsütsü shir liasü" ta EGI-isa metetdaksü.

"Meitei media-i security forces aser talisa Assam Rifles anema noktaker rongnung aden. Parnoki public tebilemba sangdonger ta shia Assam Rifles anema olulu prokshi" ta EGI-isa ashi.

"Meitei media-i kulitem mebushi. State sorkaria iba tangatetba pusema Manipur Police nem Assam Rifles anema FIR benokdaksü" ta parnokisa shisem.

Mangatetep adoka raradang state lenisübai tejak reprang aser

democratic sorkar ka ama meinyaktet, ta EGI-isa ashi.

"Iba ajanga sorkar ketdangsübaren nung kongshi aser tanü Manipur nung executive, its instruments (the police & other security forces of the state) aser bureaucracy nung kin o kin telemsa adoka lir. Imphal nung Meitei government, Meitei police aser Meitei bureaucracy lir aser tenemlen aliba lisopurtemi parnok dak tamang makar" ta EGI-isa ashi.

"State sorkari internet shibangba ya aibelen tuluka inyakba lir. Iba ajanga olulutem tali prokshi aser takoksa anguba telok indang tebilembatem noktanga ayu. Sorkari internet shibangtsü lemtet ya kanga kümdanga agitsüla. Tensa jagi noktangtsüsa kümra news sabangtem tenokdangba kübok medendaktsütsüla aser media representatives, civil society organisations aser government representatives adenba luden kati internet shibangba ketdangsüa reprangtsü tim" ta parnokisa metetdaksü.

Supreme Court-i Anuradha Basin case nung inyakyim lateta aliba anema state sorkari mapa

meinyaktsüla. Curfew alitsüsa kümra sorkari newspapers, TV channels aser online publications ajanga osang tejangja sangdongtsüla, ta EGI-isa ashi.

May 3 nü Manipur nung lendong matalokdang Manipur nung Meitei aser Kuki-Chin-Zo nung tsüingda mepetmesü tuluba kümer liasü. State sorkari külen tsütsü shir sangdong agütsüba aser policy yangluba ajanga Meitei nungeri Kuki nung anema jashiba tuluba kümdaksü ta EGI-i metetdaksü.

"Iba ajanga state ketdangsürtem aser yimtsüingtem nung aliba Kuki-Zo nung tsüingda raratep adokdaksü. Kuki nung teimba ser aliba Kangpokpi district nung demolition drive tenzüker aser ibaji February 2023 nung Kuki-Zo nung aika aliba Churachandpur aser Tengnoupal district tem nunga inyak" ta EGI-isa ashi.

"Talisa Manipur sorkari non-Naga nung alidak forest surveys, inquiries, evictions aser demolitions inyak aser iba ajanga Kuki nung dak dang iba mapa inyaker ta asütsüsa kümadok" ta parnokisa ashi.

# Assam Rifles temi Dimapur nung "Rhythm of Nagas" ayongzük



**Dimapur, Rongjui/September 03 (TYO):** Assam Rifles temi "Rhythm of Nagas" omen kübok Dimapur nung September 2, 2023 nü musical fest ayongzüka liasü. Nagaland nung sempet aliba lanurtem anitetsü aser Naga nunger sobaliba aser kentenmenü den tesendaktep tajung aliba sayutsü nükjidong nung sapang agüja iba sentong ya ayongzüka liasü. Iba sentong nung tongti tesemdanger ka ama Lt Gen HS Sahi, AVSM, YSM, SM,

GOC, Spear Corps aden aser ano sepai lenirtem den Maj Gen Vikas Lakhera, IGAR (North) dena liasü. Iba sentong nung terepranger nisung 200 dak tema dena liasü aser shilem agirtem sempet tajung ngua parnok tzüratema liasü. Lt Gen HS Sahi-i milen tsükloka iba sentong tenzük aser iba sülen Imna Yaden aser Tribal Creed Troupe lungjemer ken atenba aser tsüingsang agi shilem agia liasü. Five Minutes Band ajanga

ken tajung ka aten aser Dance India Dance nung shilem agir Meyitemsu-ia 'foot-tapping dance' ka agi shilem agia liasü. Bright Light Choir aser Mayoni Phinao nungeria shilem tajung agia nüburtem jangratemdaksü aser iba sülen Assam Rifles nungi Jazz Band anati lokti akasadaksü. Sentong tatemlen tongti tesemdanger Lt Gen HS Sahi, AVSM, YSM, SM, GOC, Spear Corps ajanga shilem agirtem nem tetushi agüja liasü.

# Aor Ordained tenzük taintem sarasadema amung

**Dimapur, Sept.03 (TYO) :** Dimapur aser temeket nung alir Aor ordained tenzükertem rongnung toklang tenzükba mapatem nungi anener alir reverend 26 adenshia Dimapur Ao Baptist Arogo tenla kidang yashi September 02, 2023 anogo nung sarasadem mapang tajung ka agiogo. Iba sarasadem mapang

parnoki Ao kin, Ao arogotem aser Ao Mungdang dak aketba tebilemsü khurettem benoka sarasadema liasü. Ano kasa sarasadem mapang, parnok ordained tenzükertemisa Naga lima nung yi tebilemsü aser bendanger yimsü agi asen lima amokbangtsü merangba mapatem, kasa atsüapong

kibakijem tenzükba tebilemsü aser Manipur state nung atalokba timtem tebilemsütem benoka sarasadem. Ibai ordained minister taintem asoshia tashi itshiba telongjem mapang tajung ka liasü aser iba sentong agitetsüsa DABA-i yariba asoshi kang pelar ta telok tenung nung Rev.Dr.L.Kari Longchari metetdaksüogo.

# Tanur kiyimba ken o nung nisung jenti aputsü: Assam CM

**Guwahati, Rongjui/September 03 (Agencies):** Assam Chief Minister Himanta Biswa Sarma-i state nung tanur kiyimba azüoktsü aoshi tasa tejangja metetdaksüogo. Ita trok nung campaign tesashi khen alitsü, ta pai ashi. Sarma-i ozüing amshirtem dak tamang akaba lemsatsep aser September ita campaign nung jenti aputsü, ta ashi. "Ita trok nung tanur kiyimba anema campaign alitsü. September ita campaign ya alitsü. Police temi par mapa inyaker, September ita nisung jenti apuba angutsü," ta Assam CM Himanta Biswa Sarma-i ashi. Kinungtsü/kinungbo ka dak tali ayuba (polygamy)

nokdangtsü asoshi ozüing yangluba dak sendakba nung nüburtem nungi telangzüba aruogo, ta Chief Minister Sarma-i September 2 nü shia liasü. Iba ozüing dak sendakba nung nüburtem nungi temetongshitsü meshiba ama pei tangatetba lemsatsepba 149 liasü aser yangji 146-i iba bill bhukuma liasü, anungji nüburtemi bhukumba sayur. Ajsüiaka lokti tentet aseme iba bill anema liasü. "Onoki iba inyakyim asoshi mera tanabuba agitsü aser ibaji anogo 45 tsüngta bill indang final drafting renemtsüba lir," ta CM Sarma-i taoba mapang Twitter ta nungja agüja aliba social media sapang X nung

zülutsü. State nung kinungtsü/kinungbo ka dak tali ayuba noksangtsü asoshi benoktsü aliba ozüing dak sendakba nung Assam sorkari lokti tentet balala dang nungi par tebilemba meshia liasü. Iba amala ozüing agizükba nung Assembly indang legislative tashi asadangtsü mechi sorkari Expert Committee shima liasü. Expert Committee nungya menden ama Justice (Retd.) Rumi Kumari Phukan aser züngsemtem Devajit Saikia, Advocate General of Assam; Nalin Kohli, Senior Additional Advocate General of Assam; aser Nekibur Zaman, Senior Advocate of Gauhati High Court nungertem alitsü.

# Assam Rifles temi Shamator aser Noklak nung "Pridhi Maithri" tenzük

**Dimapur, Rongjui/September 03 (TYO):** Assam Rifles temi nüburtem den jungtepa alitsü aser mapa tajung inyakba akhangshitsü nükjidong nung "Pridhi Maithri" kübok nüburtem ajura liasü. Assam Rifles temi September 3, 2023 nü Shamator aser Noklak district tem kübok

New Changmei, Patsho aser Wui yimtsüngtem semdanga parnoki nüburtem yariba temaitsü sayua liasü. Nagaland nung meta talang nung alirtem den tesendaktep tajung yangertsü mechi Assam Rifles temi item tesemtem nung tekülem sentep nung shilem agia liasü.

Iba ama inyaksangshi ajanga Assam Rifles temi anibelem mesasai arütsülen alirtem tejakleni tashi taitba nung len anoba tatishitsü sayur. Parnoki iba ama mapa inyakba asoshi village council chairmen, civil society organisation aser sentong nung adener temi pelaba lemsatsep.

# NA MALI KÜM ANA SÜR

## T. Meren Tzudir

04.09.2021



Nai onok toktsür küm ana oaka, nü tatenba aser tanükba onok den mapang ajak nung lir ta amanger. Na maliba agi tepela mapang ajak nung onok takü mapensar. Anogo shia onoki teti na bilemer. *-Temeim Kinungtsü aser Chirnurtem.*

# Dy.CM.T.R.Zeliang-iMongmongbenjong salem lemsatsep

**Kohima, Rongjui/September 03 (TYO):** Nagaland indang Deputy Chief Minister, T.R Zeliang-i Sangtam kin den Mongmong benjong salem lemsatepa liasü. Mongmong benjong ya Sangtam kin asoshi sobaliba aser yimsüyimbong tsütsü tongtipang benjongmung ka lir, ta T.R Zeliang-i sangdong

ka nung ashi. Alu aruba tenzük aser Tsüngrem dang tsüksüng-ensünga alu arutsü, yimchiyimjung aser arishi meshia iba benjong ya amunger, ta pai ashi. Iba benjongmung ajanga Sangtam kin tsüngta telungjem aser temeimtep tali aruts imlatsür, ta Dy. CM Zeliang-isa ashi.

# Airport nung Zuchobeni Tungoe meraketa agizük



Zuchobeni Tungoe den tetong Sanam Puri aser tetsü nungertem September 3, 2023 nü Dimapur airport tonga arudang tangokba noksa ka yangi angur.

**Dimapur, Rongjui/September 03 (TYO):** Tawa Mumbai, Maharashtra nung agiba Miss Diva Universe 2023 tetoktepeba nung top 7 finalists tongteta ano 'Miss LIVA Popular Choice' aser 'Times Miss Talented' konang ajangzükba Zuchobeni Tungoe nem tenüngsang agüja September 3, 2023 nü la Dimapur airport nung meraketa agizüka liasü.

Kentenba aser modeling asoshi la teti tejangraba lir aser social media ajanga modeling kanga junga melenshiogo aser yangji career tsütsü maongka jenti lir, ta Tungoe-isa ashi. Sempet alirtem dang pei jangraba inyaktsü lai ajungshi aser Northeast nung aliba nüburtem sorobangru tajung lir, ta ashi. Lai tetsü dang pelaba lemsatsep, shibai tetenzük nungi lenmang balala nung yaria aru aser 'beauty pageants' nung lai mezüing aniooktsü aser Miss Diva Universe tetoktepeba nung shilem agitsü ajungmesoa liasü, ta ashi. Lai nüburtem dang pei molungjang nem anidaktsütsü, tajaba ola angatsü aser tasü ita jajatsü ayongzüka liasü. La meina nungtugu kentener aser tetong, Sanam Puri aser tetsü arua liasü.

Lar kinunger den Dimapur Wozhuro Range Eloee Randan Fellowship, Phiro Eloee Khumshun Dimapur, Dimapur Sankiton Dekhungi, President Ethnic group of Dimapur aser teolungertem Deobarnü adenshia la pelashishia agizüka liasü. Lai osangbener den jembidang, la iba jenjang tongtetba ya jangratemtsüka lir aser iba mapang lai meimlai tangazükba jenti liasü, ta ashi.

### 2047 kum tashi nung India ya terenlok linuk ka akumtsu: PM Modi



September 03, 2023 nu New Delhi nung PTI Editor-in-Chief Vijay Joshi, PTI senior editors Sangita Tewari aser Nirmal Pathak nungeri Ato kilonser, Narendra modi interview agidang tangokba noksa nung angur.

#### New Delhi, September 03 (Agencies):

Amongnu Ato kilonser, Narendra Modi-i, 2047 kum tashi nung India ya terenlok linuk ka akumtsu aser kobi melii tarutsu nung alima nung rongsenketzung tulutiba linuk asem rongnung adentsu, ta metetdaksu.

Paisa, mapang talangka India ya nisung billion ka yaseta aliba linuk ka ama repranga liasü, ajisüaka tangbo iba linuk ya tejangraba alir billion ka aliba linuk aser mapa shia aliba teka

billion ana aliba linuk kumogo, ta metetdaksu.

Interview ka nung jembidang Ato kilonser Modi-i, "Tanübo India nungeritemi aintsu atema tamendakdak yanglutetsusa jenjang ka nung lir, aser ibaji taruba kum meyrjang aika nisungtemi biletetsu," ta ashi.

"Asen linuk nung ochimashi, kin tsungda tebandang aser yimsu tsungda telemsa malitsü," ta pai ashi.

Jammu & Kashmir aser

Arunachal Pradesh na nung G20 sendentem ayongzuka amenba Pakistan aser China linuk nati ashishiba dak sendakba nung Modi-i, "Linuk tesem ajaklen senden ayongzükbaji tim dang," ta ashi.

Tang Ukraine aser Russia na tsungda raraba dak sendakba nung pai, alima nung aliba region balala nung mangatetep bentetsu atema ken o jembitsüla mesüra yimtenren ajanga inyaksüla, ta ashi.

### Election kera mesüra menor agitsü tebilemba mali: Anurag Thakur

New Delhi, September 03 (Agencies): Centre nung Narendra Modi-i aniba sorkari Lok Sabha election kera ayongzüksüa akok, ta opposition lenir kari jembiba dak sendakba nung Amongnu Union Minister Anurag Thakur-i, election kera ayongzüksü mesüra menor agitsü tebilemba mali, ta metetdaksü.

Sorkari September 18-22 anogotem nung temeja Parliament senden ka ayongzükba sülen opposition lenir kari, Lok Sabha election takum December ita nung agitsüa akok, ta jembia liasü. Amongnu interview ka nung jembidang Thakur-i, election kera agitsüa akok mesüra menor agitsüa akok ta asubaji osangbenertem tebilemba dang lir, ta ashi.

India Today nungi Rahul Kanwal-i, "I&B Minister

Anurag Thakur-i, sorkari general elections kera agitsü tebilemba mali aser Ato kilonser Modi-i pa kümsük tembangba anogo tashi India sensotem tenzüksü, ta shiogo. Sorkarisa taruba assembly elections agitsü mapang atsülanger Lok Sabha election den külemi agitsü tebilemba mali ta shiogo," ta metetdaksü.

Thakur-isa Modi sorkari benokba 'one nation, one election' dak sendakba osang metetdaksü. Opposition-ibo 'one nation, one election' ya magizüker.

Parliament senden temeja ka agitsü sangdongba sülen Modi sorkari 'one nation, one election' asadangtsü atema taoba mapang Tir, Ram Nath Kovind leniba nung committee ka tentetogo.

One nation, one election pusemertemi, iba ya ajanga senotsü aser mapang

kümzüksü ta ashir, ajisüaka iba mapatong anemertemibo iba ya linuk temzung ajanga memelar aser iba ya menügdak, ta ashir.

"Thakur-i September 18 nungi tenzuka Parliament senden temeja nungji sorkar sentong tulu lir ta shiogo, ajisüaka minister-i iba senden nung benoktsü onüktembo memetdaksü," ta Kanwal-i metetdaksü.

Parliament senden nungji ozüing tasen kar benoktsüa akok, ta aikati bilemer.

Iba senden nungji linuk nung senso ajak atema UCC benoktsü, state assembly elections aser general election kasa mapang ka nung dang agitsü, sorkar nung tetsürtem nem menden tali agütsüsü aser Parliament building tasenba nung G20 group senden amentsü atema jembitsüa akok, ta aikati bilemer.

### Sept. 7 nu Congress-i district ajak nung 'Bharat Jodo Yatra' agitsü

#### New Delhi, September 03 (Agencies):

Yakum September 7 nu Congress lenir, Rahul Gandhi-i 'Bharat Jodo Yatra' tenzükba nungtem nung takum September 7 nu linuk nung aliba district ajak nung Bharat Jodo Yatra ayongzuka agitsü.

Yakum Rahul Gandhi-i anogo 130 tsungda Tamil Nadu kubok Kanniyakumari nungi Jammu & Kashmir tashi tetsung agi jaja liasü. Iba yatra nung pai state 12 ayimjem.

Congress General Secretary, KC Venugopal-i sangdong ka ajanga, mezungbuba 'Bharat Jodo Yatra' agiba anogomong September 7 nu linuk nung aliba district ajak nung nikongdang 5:00 ako nungi 6:00 ako tashi 'Bharat Jodo Padyatra' agitsü party-i lemtetogo, ta metetdaksü.

Yakum Bharat Jodo Yatra agiba mapang nung Rahul Gandhi-i lokti senden 12 nung jembia, senden tilateri 100 ayongzuka amen aser osangbenertem senden 13 nung jembia liasü.

Osangbener den jembidang

Congress lenir Jairam Ramesh-i, Bharat Jodo Yatra tanabubaji anüdoklen nungi anüolen tashi agitsü; Arunachal Pradesh kubok Pasighat nungi Gujarat kubok Porbandar tashi agitsü, ajisüaka iba sentong ya mezungbuba Bharat Jodo Yatra dang nungi tera balaka asütsü, ta ashi.

"Tejangraba aser tashi tulu lir. Iba ya nungdak, ta ni bilemer, ajisüaka anüdoklen nungi anüolen tashi agiba yatra ji anüolen tip tsütsü nungi anülulen tip tashi agiba Bharat Jodo Yatra den tera balaka asütsü," ta Ramesh-isa metetdaksü.

Yakum Bharat Jodo Yatra nung Rahul leniba nung Congress lenirtem aser zungsemtemi shilem ana lemsar anogo shia anepdang 7:00 ako nungi nikongdang 6:30 ako tashi jaja. Iba sentong kubok anogo 130 tsungda parnoki state 12 aser union territory ana ayimjem.

Rahul Gandhi bo Kanyakumari nungi Kashmir tashi tetsung agi jaja. Pa shipping container cabin ka nungsa anisungzuka liasü.

### Asenoki 'One Nation, One Education' ang nungdaker: Arvind Kejriwal



#### New Delhi, September 03 (Agencies):

Amongnu Haryana nung sentong ka nung jembidang AAP tongti lenir aser Delhi Chief Minister, Arvind Kejriwal-i, BJP-i aniba sorkari 'One Nation One Election' masü saka 'One Nation One Education' nung ang rangloksüla, ta ashi.

One Nation One Election ya sensakertem atema kechi?, Election ajak külemi dang agiba ajanga parnoki kechi ajangzüksü?, ta pai asungdang.

Haryana nung jembibaji X ajanga lemsatepa Kejriwal-i, "Linuk atema kechi tongtibang? One Nation One Election asü

One Nation One Education (Takar süaka sensaker süaka ajak atema kasa shisaliok tajung). One Nation One Treatment (Takar süaka sensaker süaka ajak kasa zungshiba" ta metetdaksü.

Kejriwal-isa, Aam Aadmi Party (AAP)-i Haryana nunga angati shisaliok tajung aser angati electric light tsükdaksütsü, ta ashi.

Anogo ka jakdang Haryana Chief Minister Manohar Lal Khattar-i, BJP sorkari angati agütsüba denbo ajaki pei sasa litetsü atema inyaksü, ta jembia liasü. Iba dak sendakba nung Kejriwal-i X ajanga, "Khattar sahab. Onoki Delhi nung angati shisaliok tajung aser angati treatment tajung agütsür. Onoki anogo shia ghonda 24 angati electricity aser tzü agütsür. Onoki Punjab nunga item maparen ajak tenzükogo aser item facilities ajanga nüburtem pelar. Kobi melii Haryana nunga nüburtemi item tajangzük angutsü," ta metetdaksü.

Linuk nung Lok Sabha elections, state assembly elections, municipalities aser Panchayat elections khenyongi külemi dang agitsü asadangtsü atema Centre sorkari taoba mapang linuk Tir, Ram Nath Kovind leniba nung zungsem 8 aliba high-level committee ka sangdongogo.

Sangkum Haryana nung assembly election agitsü lia Kejriwal-i Haryana semdang.



September 03, 2023 nu Jammu nung BJP lenirtemi Ato kilonser, Atal Bihari Vajpayee kürakyanglu semzüksüdang tangokba noksa nung angur.



## TIR YIMYIM YIMOBILEM (EDITORIAL)

DIMAPUR TENTONÜ, RONGJUI (SEPTEMBER) 04, 2023

### Asenok dak aliba tajung

**T**ang asen kidanger Manipur nung kasa Manipur state tenzükdang nungi aliba kin ana tsüngda tsükchir kümer raraba tensa tia indang ya bilemdang dang, kechiba Nagaland nungbo kin paikaya lir ser nung Naga kin o Naga kin na tsüngda tsükchitep madoki yamai tesünep aser yimjung nung putepa alir ta kanga pelaa bilemer aser Tsüngrem tenüng asanger. Aji oda, külen asen kidangtsürtemi kasa tetsürtem taküm aser temanga maochii inyakba mapang ka asenok Nagatsürtemibo 'India Got Talent' sentong ama nung India ajak anakshia ken tajung tena Nagaland nem tenüng tajung bener arutsüba angudang temulungjang nung tepela masemer aser kodaser asenokbo yamai tajung aküm ta süngmanga bilemer. Atangji, item ajakji Tsüngremi asenok meima asenok nem shisa aser jakla tajung enoktsüba ajanga tesünep nung Naga kin o Naga kin na tsüngda putepa litetter ta angatetter. Ibaji kodang asenoki jungjunga bilemdangdir, Naga kintem rongnung asenok Aotsür Aortem daka tajung tuluka lir ta reprangtetter. Item tajungtem rongnung, Aor dak aliba shisatsü aser jakla tajungtibaji temeim aser taremsük asütsü. Atangji, asenoki aiben asenok o asenok na tsüngdangbo aibelen tilaka nunga aremsükteptsü makoker saka tangaribo asen anema tuluka aibelen nunga taidoktetter ta jembir. Ibaji shitak lir. Ajisüaka, ibaji kodang bilemdangdir, alima meimchir yimya nung kinunger o kinunger na tsüngdabo o tilaka agia tuluka kuma asateper saka tangar denbo kinungertem den toktepba jembiba amabo mejembir. Iba jagi aiben asenok rongnung kilongraba aser yimdongjungba ta jembir. Ajisüaka, asenok Aortem ya kilongraba masü aser yimdongjungba-a masü, asenok ya temeim aser taremsük aliba nübortem lir. Asenok ya yimjung meimertem aser tesünep nung linürtem lir. Ibayongji asenoki tenük melen tenük aser tepo melen tepo agitsü ta asüba nung mamanger aser ibaji Ao kin tamangba yimsü aser sobaliba masü. Atangji, asenok o asenok nabo tai medoktepteter saka tangar nembo tadok memeshidangyongi agütsür alir, ibaji asenok tasümitba agi lir ta asenoki asenoksasa lua jembir. Ajisüaka, asenok Ao kin-a tangar amaji tangar nem tadok magütsütetba aser maremsükteptsü tasütait kin ka sülasang Nagaland nung tanga Naga kintem ya tali mejungla ta bilemer. Alima kintem rongnung tesünep aser yimjung nung alitsübaji kin katibo aremsük nung dang aser kin katibo aibelenertem nem tadok agütsütet nung dang litettsü. Tangar tai ser nung tadok agütsübaji aser tamajungertem dang aremsükbaji tasümit jakla aser shisatsü masü saka ibajiang tasütait, shisa tulu aser talang jakla lir. Taremsük aser tadokji telok tuluba, teimba aser tashi taitba purtemi nungi arutsüla. Aji oda, Nagaland nung Naga nungertem rongnung Ao kinsa tesashiba, taremsük tilakata mali, azü nübener amai ka dak teraka tangshi nung ajak oloka arur ta tangar kin anema inyak nungbo koda asütsü? Tangar kong koma alitsü? Iba jagi asenok dena Naga kintem rongnung teti tsükchitepa alitsü. Atangji, asenok ali nung kanga morumoru, asen senotsü nunga kanga ochimashi, iba jagi balaka asenok mepeteper aser tangar mulung yirutsür. Itemji asenok dak aketba jakla tamajungtem lir. Itemji melenshidi aser asen dak aketba jakla tajungtem temeim aser taremsük ya Naga nung teti putepa alitsü atema mozü tajung ka ama amshidi. Aji oda, Naga nungertem Yisu temeim meteta putepa litetba nung ya asenok Aor dak aketba temeim aser taremsük tenla tulu lir. Asenokbo tasütait nokinketer kinji ta ser shinga danga temeim mesayu aser maremsük ser tangar dang tsübudakja alika asübo, Naga kintem yamai putepa melila aser asenoka tesünep nung yamai melila. Tangar kin kati ka amaker, yim rongdoktsür aser kin ajak okshia samatsütsü meranger, ajisüaka asenokbo kin tapu aika meyoktepa alir ser nung yamai putepa litetba ya, atangji, Tsüngremi asenok nem temeim aser taremsük shisatsü agütsüba ajanga lir. Iba jagi asenoki ajaklen ajak den kasasa putepa liteter. Aji oda, asenoki tangar den kasasa meküptepba agi mesüra tangar dang meima taidoktetba agi asenok lapia ta mebilemli, saka iba jagiang Nagaland nung Naga nung teti putepa litetter ta asenoki angatetdi. Iba temeim tajung aser taremsük tashi jagi dang tarutsü nunga Naga lima tajungba kuma yangertettsü.

## OLEMSABANG

### LAISHIBA-i TUYUBA/SAYUBA AROGO INDANG KÜ TANGATETBA

~ L. Kika Pongener.

(Yashi adok nungi...)

ABAM "Inyakyim Leniba" Revised Edition' 2022, Tapu-14,  
Page : 87- 88 nung...Yamai zülua lir :

#### TEMESHI LAI TESAYUBA AROGO (BIBLICAL CHURCH MODEL)

1. Lim arogo tenzükbba nung tongti lenir ka dang alitsü aser aji Pastor asütsü.
2. Deacon Board nung Ministry lenir (Associate Pastor Women, Youth, Christian Edu. etc.) züngsem atentsü.
3. Arogo senpong ka asütsü. Sactioning authority-ji Board of Deacon asütsü aser yangji DDO Pastor asütsü. Küm shia arogo yinti aser Ministry balalai inyaktsü sentong yanglua budget lemzüksütsü aser senpong ka nungi agütsütsü. Ministry jurila sen kecha malitsü.
4. Arogo nung Ministry ajak külemi inyaktsü, ano ministry balalai nungdakba ama mapa inyaktsü sadema lapoktsütsü, saka arogo temelaba agir dang inyaktsü. Arogo yinti aser Ministry balala nung sentong balala agitettsüsa maparen ajak angatettepa amalitepa inyaktsü.
5. Nungdakba mapang, mesura Ministry balalai mapa kar, mesura Project kar inyaktsüsa adokra, arogoi budget nung inoka mesura, rongsen lenmang bushia inyaktsü lenmang lapoktsütsü.
6. Ministry ajak nung Board aser Committee alitsü aser Deacon Board nungi Representative alitsü aser Pastor Ex-Officio asütsü. Küm tepiyong iba Board ajanga Ministry sentong renema inyaktsü aser küm tsüngda sentong kar budget maliba adokra, Board/Committee ajanga Deacon Board dangi abentsü.
7. Arogo nung Deacon shimdang Tetsür aser Tebur tebandang mekai shilem agitettsüsa asütsüla.
8. Arogoji Mission atema alir, anungji Tenyaba mapa nung ajak külemi shilem agia inyaktsü aser Mission Board nung Ministry ajak nungi Representative adentsü.

Tang ABAM küpok lim arogo shia inyakyim repranga aonung, ashiko, arogo teimba ka, Ministry/Department shia senpong balala yua alitsü sudi. Aji oda, Ministry/Department shia senpong balala asüba agi, arogo nung tenla-tenji/saru-saji aika sarur, aser item ajakji kibong dak mesuker. Ibagi, arogopurtemi tenla/saru agi lakteter ola adoker. Aser ano Ministry shia osettsüset, ki-o-jen, ali-kimong balala yua alitsü sudi. Arogo-bo ka dang sernung, arogo balala amai senpong/oset/ki-o-jen/ali-kimong balala ayur. Ashiko, iba yayim nungji maneni ora, mapang kabo arogo nung mepetmesu adoktsü akok. Ano arogo nung 'Deacon' shimdang...Tetsür nembo shilem magutsür. Surabang, aji laishiba tesayuba asü masü (?)...ta tebilemdangtsü ka lir, kechiba sura, arogo yabo shilang alangba 'Putu Menden' den meyoktepa mangatettsüla. Ano lim arogo nung tekolak aika lir, aser item tekolaktem tsüngda tashi (Power) raktepa, khi-khenbo arogo nung mepetmesu-a adoktsü. Anungji ABAM küpok lim arogotem ajak laishiba tesayuba ama liromedema aotsü asoshi, temelenshiba ka nungdaker...ta reprangteta, mungdang lenirtemi iba inyakyim ya bener aitba sudi...ta angateter. Anungji, iba inyakyim ya lim arogo ajaki agizüka inyaka aonungbo kanga jungla...ta ni angatetba maneni lemsateper.

Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir

# ABAM Women Ministry 7buba Triennial Conference agiogo



**Impur, September 03 (TYO):** ABAM Women Ministry Mrs. Alemla Mozür Secretary leniba nung 7 buba Triennial Conference September 1-3, 2023 anogotem nung "Asüng Teimla asoshi Tanü Tetsür" (Ezekiel 17:22-24) omen sür Impur nung kanga takok ngua agiogo, ta ABAM Executive Secretary Rev. Dr. Mar Pongener-i sangdong ka ajanga metetdaksü.

Iba sentong ya shilem anaketekülem sentong aser angazükyim sentong, ta lemsar agia liasü. Conference Omenji tekülem sentong nung onük agia liasü.

Tekülem sentong nung O

Jembirtemji Rev. Dr. Mar Pongener, Executive Secretary, ABAM, Dr. Sahinungla Pongen, Asso. Professor of Christian History, OTS aser Mrs. L. Watinaro, Asso. Pastor, Mangkolemba liasü.

Angazükyim sentong nung onüktem; Tetsür anema alitsüiyim, Sangyu Ratep nung tetsür, Kasa atsüapong aliba, Tekolok anema aliba, Pei sasa nokdakteta litetba aser Chiyungtsu achitsü nung ta liasü.

Angazükyim nung Shisa Len sayurtemji Dr. Süpongmeren, Senior Specialist (Obs & Gyne) IMDH, Mrs. Benjungdenla Yaden, Reader, SCERT Nagaland, Ms. Imtimenla Aier,

APW, Süngkomen BC, Ms. Moamenla Longkümer, Dist. Mission Coordinator Dist. Hub for Empowerment of Women, Mokochung, Mr. Tsükti Longkümer, Proprietor, Longpok Holdings aser Mr. Sendongkaba Jamir, Ass. Food safety Commissioner DHFW, Kohima liasü.

Ajak agi Arogo 160 nungi delegates 1,160 arua aden.

ABAM Women Ministry kübok tetsürtem ajanga asen lima nung rangben temelenshi bener arutsü nükla yur inyakdang Tsüngremi tashi agüja Pai mulungba nübur ,ta shitettsüsa litettsü lenisüba tajung agüjangma.

# Iraq nung ISIS teloki Khristantem anema inyakba atema jemb



**September 03, 2023:** September 01, 2023 nü Iraq nung Kurdistan region kübok Erbil nung United Nations Team to Promote Accountability for Crimes Committed by Da'esh/ISIL (UNITAD) senden nung adenertem tangokba noksa nung angur.

September 03, 2023: September 01, 2023 nü Iraq nung Kurdistan region kübok Erbil nung United Nations Team to Promote Accountability for Crimes Committed by Da'esh/ISIL (UNITAD) senden nung Islamic State teloki Khristantem densema meimchirtem anema inyakba mapatem b u s h i s ü n g d a n g b a metetdaksüogo, ta International Christian Concern (ICC)-i metetdaksü.

Iba senden nungji Iraq nung Khristan lenir 30 den Iraq kübok Kurdistan Region, Europe aser America nungi lenirtem aika aden.

Iba senden nungji ISIS kiralongrar teloki Iraq nung Khristantem densema minorities anema inyakba bushisüngdangba osang metetdaksü.

UNITAD Special Adviser, Ritscher-i ISIS teloki Mosul yimti aser Ninawa plains nung aliba Khristan nüngo kiojentem raksatsüba, Tenla kitem, monasteries, cemeteries aser Khristan temaitsütem

raksatsüba osang tejangja metetdaksü.

Kurdish lenirtemia Kurdistan Region-i Iraq nung Khristantem jenokdaksüba osang metetdaksü.

Kurdistan Regional Government's (KRG) Department of Foreign Relations tongti, Safeen Dizayee-i, "Iba lima (Iraq) nung Khristantem ya lisopurtem lir aser maneni Khristantem taküm akhümketa aser kümzüka alitsüla," ta ashi.

Kurdistan Regional Government (KRG) Coordinator for International Advocacy, Dindar Zebari-i Iraq nung Khristantem reshikangshiba putiotsü metetdaksüba den külemi tang Iraq nung anünga aliba Khristan 200,000 nungi teimbaka Kurdistan region nung jenoka aliba metetdaksü.

Zebari-i, "2003, 2006 aser 2009 kümten nung kiralongra ajanga parnok aika timtema pei talidak nungi jenshi. Iba mapang nungji Tenla kitem aser ki aika raksatsü, ibayongji parnok

tesünep aliba tesemtemi oa jenoktsüsa aküm," ta metetdaksü.

"Talisa 2014 küm ISIS (ISIS)-i amakba mapang nung Khristan meyirjang aika jenshia liasü aser Kurdistan Region nung jenok," ta paisa metetdaksü.

Iraq kübok Nineveh Governorate nung aliba Khristantemi anogo shia amokmeren ajurur, kechiyong telungpurtem aser Islamic kiralongrartemi timtem agütsüba dang masü saka Turkey linükia anünglen nungi bomb amshia Khristantem amaker.

Saddam Hussein yimsüsüba mapang nung pai linük nung nütsüng yongsük sükdanga liasü aser iba mapang nungji linük nung Khristan nütsüng million 1.4 liasü saka tangbo linük nung Khristan nütsüng 250,000 den tajemba lir. 2003 küm Iraq War mapang nung Khristan nütsüng ajema aküm, iba sülen IS kiralongrartemi Nineveh plains atsünga agiba mapang Khristan nütsüng ano kanga agi tajemba aküm.

# ANOGO ABEN TSÜNGREM DEN

## Tezülen alir atongba Kolosi 4:5-6

### Mapang tajung kishitem

Mapang tajung alizüka, tesülen alirtem tsütsü shisatsü nung jajaang.

Pauli yangi asenoki mapang tajung ajak amshitsü ashir - kuli asütsü mapang tajung. Asenoki aji mezüdokli. Asenoki osangtajungji mamangertem den lemsateptsüla.

Mapang tajungji teti asenok den malir. Ibai arur aser süia aor. Ibai lemtsü mesük - aruya angur aser süia orbo asenoki tejaklen lemtsü to masü tesülen dang angur. Tanübaji dang asenok meyong. Asüngji asenok den mali. Tanü topur junga, tashi itta aliba ama asüng malitsü akok. Anungji tanü ta ajaba mapang tajungji alangzüktsüla.

Yisu Khrista kuli sürtem ama, asenok nem mapang tajung moatsür. Asenok renema alitsü Kibubai kuli tejangja agütsür. Itemji mapang tajung kichiba lapokba ama arur, shidak jembitsü aser shidak nangzüktsü mapang tajung lapoktsür. Kichibaji lapoka lir aser shibangtsü. Asenok mulungjang nung kechi lir aji ashitsü asenok mapang lir, tasüngdangba nung telangzüba agüjang, anepaluba kuli süba jembiang, idakji mapang aotsü.

Khristai samaa aliba pur atema aria bilemba aser alangzükba temeim agi ajungmesodakja asenok Pa o agi sobua renema alitsüla aser kichiba lapoktsübaji metetta alitsüla. Tanela, shibai asenok anir aser Khrista O tem bilemtetdaksür iba asoshi asenoki Tsüngrem tenüng sangdi.

Kibuba, kuli asütsü asoshi mapang kichiba lapoktsüba asoshi ni sayuang aser renema alitsü sayuang.

# 'The Passion of the Christ' film tasenba January ita nungi tangoktsü



**September 03, 2023:** 2004 küm Mel Gibson indang Khristan film 'The Passion of the Christ' kanga takok anguba sülen maneni iba film tasenba sangküm January ita nungi tangok tenzüktsü, ta osang ka ajanga metetdaksü.

'The Passion of the Christ: Resurrection' film otsüji Khrista Kangki nung metaba mapang nungi Pa tasü nungi shia aruba mapang tashi nung rangloker yanglu.

Journalist, Ruimy-i, "January ita nungi Gibson-i 'The Passion of the Christ: Resurrection' tangok tenzüktsü. Küm tomlen nungi tangoktsü sentong liasü saka January ita nungi tangoktsü," ta metetdaksü.

2004 küm Mel Gibson-i direct asüba film 'The Passion of the Christ' ajanga dollar sen

million 611 ajangzükta liasü aser Oscar nominations asem (Cinematography, Makeup aser Original Score) angu.

"Gibson-i 'Braveheart' film otsü zülur, Randall Wallace den senteper Passion of Christ film tasenba otsü trokben tashi züluogo," ta Ruimy-i metetdaksü.

Gibson-i tesüsabuba direct asüba film ji 2016 küm sayaba 'Hacksaw Ridge' film liasü aser iba film ajanga Best Picture, Best Director aser Best Actor densema Academy Award nominations trok ngua liasü.

'The Passion of the Christ: Resurrection' film dak sendakba nung tawa Gibson-i, "Iba ya mapa tuluka lir; zübazüba inyaktüla mapa ka masü, mesüra kerakera inyaktüla mapa ka masü," ta metetdakja liasü.

AO OSHI ANGAZÜKDAK:

TANÜ ANGAZÜKTSÜBA OJANG



Sadang

(n) nokdang, tzü temdangba (water parting)

\* Mosai temeren tzüym **sadanger** Israel nunger anir ao.

Sademsademer

(adv) tesem tulu, ayongayonga anenzüksü akokba tesem (spacious)

\* AKM mungdang ki **sademsademer** yanglua liasü.

OLONG PAITEP # 6625

Grid for crossword puzzle #6625 with numbers 1-17.

TIPIEN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S \_ \_ \_ i - (3)
9. Nisung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatembangtiba - (5)
17. Meputep - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Majinü - (5)
13. Tzuma nung senzüba - (5)

OLONG PAITEP # 6624 TELANGZÜBA

TIPIEN :

- 2. Bangsemo, 6. Tiptem, 8. Jen, 9. Talila, 11. Aren, 12. Tzübo, 14. Alia, 16. Angati, 17. Odi, 18. Azü, 19. Sünglang.

LANGTSÜNGLEN :

- 1. Yipten, 3. Nüja, 4. Sangro, 5. Milen, 7. Tulu, 10. Laza, 11. Aben, 12. Tiyong, 13. Ajizük, 14. Aitsü, 15. Tasa, 16. Aina.

NAI-A YA METETTER MA

TANG TASHI NUNG CRICKET ASIA CUP AKOKBA LINÜKTEM

Table with columns Year, Winner, Year, Winner showing cricket tournament winners from 1984 to 2022.



Tanur asoba anogo nung salem osang den noksa angati adokdaksünura - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenüing : .....
2. Tasoba anogo: .....
3. Küm : ..... 4. Class : .....
5. School : .....
6. Talidak : .....
7. Salem osang : .....

CM Sarma-i 2024 Lok Sabha elections yimyim ayimoktsü

Tinsukia, September 3, 2023 (Agencies): Assam Chief Minister Himanta Biswa Sarma-i Honibarnü 2024 Lok Sabha elections atema yimyim ayimoktsüogo.

BJP-i aniba NDA ajanga Assam nung menden 10 tema nung takok angutsü ta CM Sarma-i ashi.

Tinsukia district nung ruling MLA ajak külem senden ka nung Chief Minister Sarma-i iba osang metetdaksü.

Iba senden nung BJP, Asom Gana Parishad (AGP) aser United People's Party Liberal (UPPL) MLA ajak aden.

"Assam nung asenoki Lok Sabha menden 9 nung takok 10 tema nung takok angutsü alizüing lir. Assam nung alirtem teyari ajanga asenoki 2024 elections nung menden 10 tema nung takok angutsü" ta pai ashi.

"Taruba elections atema BJP road map yanglutsü senden menogo. Onoki onük aika benoka lemsatepogo aser nisung shia dangi development schemes atongtsü jembio" ta Sarma-i metetdaksü.

Assam sorkari polygamy aser love jihad anema inyaktsü

as er winter session nung polygamy noktangtsü atema bill ka benoktsü, ta paisa ashi.

Parliament indang winter session nung Panchayati Raj Act yanglushitsü, ta CM Sarma-isa shisem.

Senden nung minister Pijush Hazarika aser minister Ashok Singhal na aden.

Senden takok ngua menogo aser 2024 Lok Sabha elections nung NDA-i BJP nem takok tulu bentsür arutsü, ta Sarma-isa metetdaksü.

2024 Lok Sabha elections ya sangküm March-April tsüingda agitsü sentong lir.

Arunachal Congress MLA-i monogamy pusemba bill benoktsü

Itanagar, September 3, 2023 (Agencies): September 4 nungi tenzüker 7 tashi 7 buba Arunachal Pradesh Legislative Assembly monsoon session alitsü.

Iba atema Assembly Business Advisory Committee ajanga list renemba nung state sorkari tongtipang bill aika benoktsü sentong lir.

Külen, session anogo tanabuba nung Arunachal

Pradesh Monogamy Election Eligibility Bill 2023 ta ser private member's Bill ka benoktsü.

Iba bill ya Congress MLA Ninong Ering ajanga benoktsü. Iba bill ajanga Arunachal Pradesh nung lateta aliba electoral laws nung kinungtsü ka dang aliba candidate tem tokteptsü aser MLA inyaktsü tenelenshi ka bener arutsü.

Iba bill ajanga monogamy ajungkettsü, kibong akangshitsü

as er yimtenren tsütsü tashishitsü melii inyaksangshitsü.

"Kinungtsü ka dang alir toktepa ajanga onoki nisung ka tangatetba tajung nung alitsü aser kinungtsü ka den dang kiyima alitsü ajungkettsü" ta MLA Ering-i ashi.

Arunachal Pradesh Representation of the People Act, 1951 nung temelenshi ka bener arutsü atema iba bill benoktsü ta paisa ashi.

'One Nation One Election' atema ajak den asüngdangteptsüla: Gaurav Gogoi

Guwahati, September 3, 2023 (Agencies): "One Nation One Election" atema High-Level Committee-i tashishitsü melii aser ajak tebilemba angadanger ang telemteba agitsüla ta Assam Congress MP Gaurav Gogoi-i ashi.

"High-Level Committee meshim dang Bharatiya Janata Party (BJP)-i National Democratic Alliance (NDA) nung dena alir ajak den tebilemba lemsatep asü masü?" ta paisa asüngdang.

"Ni ibaji metetnür kechiyong party ajak den mezüing jembitsü tim. BJP-i NDA nung dena aliba telok ajak den jembitep mejembitep? Iba ya nübertem

anisations atema inyakba mapa ama ni bilemer. Hopta ana shi ka lir sülen iba onük samadoktsü" ta Tarun-i ashi.

High-Level Committee tentetba ya teti inyaka aruba inyakyim ka dang lir ta Congress lennir Jairam Ramesh-ia tanü metetdaksüogo.

Iba Committee nung züingsem shimba repringdangra, koloni anitsü'ar shiteter, ta pai ashi.

Lok Sabha nung Leader of the Congress Adhir Chowdhury-ia iba Committee nung adentsü memulunger.

Adhir Ranjan Choudhary-i Home Minister Amit Shah dangi züluba shidi ka nung pa committee

nung madentsü shiogo.

Iba committee inyakyim latetba nung onük kar dak rangloka lir aser iba mapa ya tenüing atema dang lir ta Choudhary-isa ashi.

General elections agitsü ita ishika dang lia "One Nation One Election" ajungbena jembiba nung taitü keta lir ta paisa ashi.

Iba committee nung Rajya Sabha nung Leader of the Opposition medendaksüba ya parliamentary democracy inyakyim masü ta Choudhary-isa metetdaksü.

"Item onük nung ajemdaker committee nung adentsü magizüker" ta Adhir Choudhary-isa Amit Shah dang shiogo.



International Primates Day nung Aaranyak ajanga Arunachal Pradesh nung awareness program ayongzuka agidang tangokba noksa angur. Aaranyak ya Biodiversity conservation organisation ka lir aser parnoki Lohit district kübok Government Upper Primary School ka nung sentong agidang Northeast India nung 'Hoolock Gibbons' wazuka ayutsü tesayuba agütsü. Iba sentong nung shisalen sayurtemji Aaranyak nungi Mridupaban Phukan aser Akshay Upadhyaya na liasü.

# Eritrea nungertem Israel nungi meindokner

**Jerusalem, Rongjui/September 03 (Agencies):** Honibarnü Tel Aviv nung rongrong adokba nung dena alir Eritrea nung asylum bushirtem tekeraba nung par limai meyipa yoktsü densema Israel-i mera tesashi agitsü asadanger.

Eritrea yimli bhukumer aser anemer tsüngta aser police den raratepba mapang nisung 170 shi yirua liasü.

Ato Kilonser Benjamin Netanyahu-i 'red line' ajangogo ta ashi.

Pai "illegal infiltrators" ta ajaba African migrant ajunga linük nungi agientsü asoshi sentong tasen ka inyaktüsü tuyuogo.

Eritrean sorkar anemer activist temi Israel ketdangsür dang par linük indang embassy ajanga sentong ka ayongzüka aliba thitsütsü asüngdangogo ta ashiba sülen Honibarnü iba rongrongshirong adoka liasü.

Parnoki iba tesem müketa police barricade yua aliba nungpoka ai aser tesem ya raksatsü.

Police tem riot gear nung arua tear gas, stun grenades aser injang khaloktsü aser

police tem longkak aitertem meindoktsü meranga liasü.

Injang khaloktsüba ya ozüing nung aliba ama inyakba asü masü ta bushisüngdang tenzüko.

Israel police temi parnok takum lendong nung liasü, ta ashir kong parnoka aika yiru.

Yimtung nung Eritrea nung telok aika tsüngta raratepa liasü, kong nisung kar süng, yinsang aser long amer liasü. Parnok kati ka dak teka sangshiba mapang dokan kijiba aser gari nunga teka sangshi.

Tir Isaias Afwerki yimsüsüba mechi Eritrea nung telemsa adoka aliba ya bendang lima nung alirtem dak tashi kongshiogo.

Tel Aviv tiyonglen alirtemi ashiba agi, yimtung ya ghonda ishika raradak tesem amai liasü, kong police helicopter tem anünglen yimzü aser siren ola adoka liasü.

Sorkari obendangba tashi azüoktsü asoshi sentong yangluba mechi Israel nungertem sadanger aliba mapang ka nung yimtung nung iba ama ki o jen nung kongshia mepetmesü adokba ajanga

migrant indang ken o tanaben yimten dangi arur.

Migrant tem Israel nungi meindoktsü merangba Supreme Court-i nokdang, ta Netanyahu aser par cabinet ajanga tenüing asener.

"South Tel Aviv aser dangalen ozüing alema linüki aiter tebilemsü tulu lir," ta ato kilongseri Deobarnü sorkar senden ka amendang ashi.

"Rongrongshirong nung shilem agirtem tekeraba nung linük nungi meindoktsü densema iba ama mapa tamajung inyaker anema mera tesashi aginer."

Ozüing alema linüki aitertem meindoktsü atema minister temi sentong balala yanglua pa dangi bener arutsü Netanyahu-i ayongzüko.

Tang Israel nungya Eritrea nungi asylum bushir nisung 18,000 shi lir ta asadangteta lir, aser parnok ya timba küm ishika tejaklen Egypt indang Sinai Peninsula ajanga ozüing alema aru. Parnok ya lendong timtem balala aliba, reshikangshiba aser tebur ajak mitkar nung züingoksemsüba ozüingtem mechi jena aru ta ashir.

# France nunger sepaitem linük toktsür aotsü khanga Niger nung longkak ait

**Niamey, Rongjui/September 3 (Agencies):** Niger nung nüburtem meyirejang aikati France indang military base ka nung adenshia, France nunger sepaitem linük toktsü aotsü asoshi khanga liasü.

Military-i sorkar atsüngba sülen France dang parnok sepa 1500 Niger nung amenoka aliba anintsü asoshi tetuyuba agütsü ajisüaka parnoki tang tashi kecha jenjang magi lir.

Honibarnü military base kima longkak aitertemi France indang sentsü semdaksür aliba napong ka tekong rangdangtsü aser France wako agi alepbanger tasü mang süngden ka bener senzüa liasü. Tanga longkak aitertemi France dang linük toktsü asoshi khanga liasü. Iba tatalokba ya sepaitemi

repranga ata liasü.

"Tanü onok taküm bedanga agütsütsü renema lir, kechiyong onok nema adanger," ta longkak aiter Yacouba Issoufou-i ashi. "Parnoki onok indang alirongsen auya aser onoki meteta kümogo. Anungji parnok kechisüdir süaka linük toktsür aotsü."

July 26 nü military-i sorkar atsüngba sülen Honibarnü ya lokti tulutiba adenshia liasü aser iba ajanga nüburtemi military lenir tasentem pusemba sayur.

Military-i atsüngtokba tir Mohamed Bazoum aser France na tesendaktep tajung liasü. France tir Emmanuel Macron-i Hokolbarnü ashiba agi, pai atsüngtoker aliba Nigerien lenir den anogoshia jembidar aser telemtetba kechi südir süaka

Bazoum den sensaksema dak ajemdaker agitsü.

Taoba hopta military-i ambassador, Sylvain Itte dang linük toktsür aotsü tetuyuba agütsüba sentoka toktsüba sülen France anema nokdakba tali aküm.

July ita military-i sorkar atsüngba sülen alima kin tashitaittem aikati iba tesem temeket ya military yimsüsüba agi melentsü ta tebilemsü akar.

Military-i sorkar atsüngba ajanga France dak tamajungba kongshiogo aser Mali o Burkina Faso nunga military-i sorkar atsüngba sülen France nunger sepaitem mintokogo aser iba ajanga item linüktem nung telungpur anema raratsü asoshi parnok tashi meiti kümogo.

# Russia-i drone amshia Odessa kübok Danube port amak: Ukraine

**Kyiv, Rongjui/September 3 (Agencies):** Russia-i drone amshia Deobarnü Odessa antiöletiplen tesem kar ghonda asem ser tesadang makogo. Drone yagi Danube River port nung infrastructure raksatsü aser nisung ana tashi yiruja liasü, ta Ukraine nunger ketdangsürtemi ashi.

Ukraine indang air defence systems-i, Iran nung yangluba Shahed drone 25 nungi 22 bo khazüka yokogo, ta Air Force-i Telegram messaging app ajanga metetdaksü.

UN-i teyongtsü ia Black Sea ajanga jangotsü belentsü atema tenangzüktepba

yangluba July ita mechirep tsüngda Danube ya jang belentsü asoshi Ukraine atema lenmang tongtibangtiba liasü.

"Alima nung ayawara aser chiyongtsü agi anüngdaksütsü nükjidong nung Russia nunger kiralongrartemi rongnendak infrastructure tem maneni maka arudar," ta Urainian tir indang chief of staff Andriy Yermak-i Telegram nung zülutsü.

Paisa, mibenertemi tesem ka nung mi temsepa aliba indang noksa ka lemsatepa liasü.

Ukraine indang South Military Command-i social media ajanga ashiba agi, drone

amshia amakba mapang civilian ana yiruogo, koba parnoki ashiba agi, Danube nung civil infrastructure amakba mapang yiruba lir.

Ketdangsürtemi koba port indang facility amak iba indang osang tejangja magütsü.

Ukraine nung media kar ajanga ashiba agi, drone tem yagi Reni port maka liasü koba Danube nung tongtibang port ana rongnung ka lir.

Danube ayong nung Reni aser Izmail ya Ukraine indang port tulutiba ana lir aser hopta tsüngda Russia-i drone amshia iba port ana kanga atonga maka arudar.

## MULUNGNEN O



Tasoba Anogo 13-11-1962

Tasüba Anogo 31-08-2023

Onoki teti meima aliba asür **Chubameren Longkong**. Pa shiranga aliba anogo nungi tasüba anogo tashi nung kija, kibong aser lokti balalai sarasadem aser rongsen, nübu agi yariba onoki ajak dang kanga pelaba iba osang ajanga lemsateper.

Aser ibai bo meshi melitet nung yangi item lokti tenüingtem agütsür.

1. Luyim Ao Baptist Arogo Jharnapani.
2. Dimapur Longkong Senso Telongjem.
3. Dimapur Longkongtsür Telongjem.
4. Dimapur Longkong Tamang Telongjem.
5. Longkumer Kidong Longkong Village.
6. Yongpur Kidong Longkong Village.
7. Medzephima Town Ao Baptist Arogo.
8. Langpangkong Senso Telongjem, Medzephima.
9. Kukidolong Village Council.
10. Longkong Telongjem, Kukidolong.
11. Highway Patrol, Kukidolong.
12. Political Science Department, Immanuel College.

Enok temeim mapa tajung asoshi onoki kecha meyipa magütsütetaka, asen Tsüngrem-i nenok ajak moajangma.

~Temeim Kinüngtsü, Chirnur aser Kinungertem.

## Menungra Bilemteter



Asür NOKJUSANGLA (Chuchuyimlang)

Pungmang ama bilemer saka asangsang nung nai onok toktsür or küm ka abensa aruaka onoki na kodanga mamateter, nü sarasadem teti onok den lir

~Temeim Chirnurtem aser Semchirtem.

## Republican nungi tir atema Donald Trump jenjang tajungba

**Washington, Rongjui/September 03 (Agencies):** Taruba küm election atema Republican telok nungi tir tokteptsü asoshi tang nübuyimba nung Donald Trump jenjang tajungba lir, ta The Wall Street Journal (WSJ) poll ka Honibarnü sayaba nung shia lir.

White House asoshi toktepba nung Republican primary voter shilem 59-i arishi küm 77 tain taoba tir bhukumer, anungji taküm April ita kasa osangkaket ajanga survey agiba mapang dang nungi points 11 timba akumba sayur.

Trump-i mapa tamajung inyakba ken o bezü molungsoa agizüka lir, aser iba yongji vote agütsütsüpur rongnung pa tali nüingtugu akum aser GOP asoshi toktepba nungya pa yakbang akum.

Pa anema ken o benokba ya pa kümsük tanabuba inyaktüsü arishiba nung tenokdangba agütsütsü merangba shilem ka lir, ta pai ashir.

GOP nomination atema taoba tir den tokteptsü danga 2024 Republican presidential contenders tem jangratema maliba iba survey ajanga sayur.

Taoba South Carolina Governor Nikki Haley bhukumer shilem ti lir, Indian American tech entrepreneur Vivek Ramaswamy

bhukumer shilem pongu, taoba New Jersey Governor Chris Christie bhukumer shilem asem aser taoba Vice President Mike Pence aser South Carolina GOP Senator Tim Scott na bhukumer shilem ana-na lir.

April ita agiba poll sülen Haley, Ramaswamy, aser Christie nunger bhukumba terara lir, saka jangratemsü maket.

Trump aser US Tir Joe Biden na ano tanaben tokteptsü ama takzür aser iba poll nung candidate anaprong bhukumer shilem kasa 46 lir aser shilem ti telemtetba magi lir.

Trump anema ken o benokba ya yimtenren tsütsü nungi inyakba lir ta Republican primary voter shilem 60 dak temai ashir.

2020 election sülen Trump-i inyakba ya ozüing agi mela lir, ta shilem 79-i amanger aser shilem 16-i dang Trump-i ozüing alema Congress nung 2020 presidential election results kulizüing agütsüba nung tenokdangba agütsütsü merang ta ashir.

Ken o benokba ajanga Trump bhukumtsü ajungmeso ta shilem 48-i ashir.

WSJ ajanga iba poll ya August 24 nungi 30 tsüngta agia tenüing zülüoka aliba voters 1,500 aser primary voter 600 dang telephone aser web survey ajanga asadanga liasü.

## Hockey 5s Asia Cup akokba atema HI-i asayartem senpettsütsü



**Rongjui/September 3, 2023 (Agencies):** India tebur hockey team-i Hockey 5s Asia Cup Championship akokba sülen Hockey India-i asayar ajak nem senpet sen lakh anana agütsütsü nangzükogo. India team-i final nung penalty shoot-out ajanga Pakistan koka liasü.

Mezüngbuba Men's Hockey5s Asia Cup, ya FIH Men's Hockey5s World Cup Oman 2024 atema Asia qualifying asayamung lir. Honibarnü final asaya nung team anapronglai kanga junga asaya-a atakzüksür aliba mapang tashi nung goal 4-4 idaktsü aser penalty asayaba sülen India-i goal 2-0 agi koka liasü.

India team atema Mohammed Raheel (19, 26) Jugraj Singh (7), aser Maninder Singh (10) nungeri goal idaktsü

aser Shoot-Out nung Gurjot Singh aser Maninder Singh nati goal kaka idakja liasü.

Iba asayamung akokba atema Hockey India-isa support staff tem nem sen lakh kaka agütsütsü nangzükogo.

FIH Men's Hockey5s World Cup Oman 2024 atema qualify asüba aser iba asayamung nung Gold medal anguba atema team nem tenüngsang agütsüba mapang Hockey India tir Padma Shri Dr Dilip Tirkey-i, "Oman nung team-i kanga junga asayaba atema aser kanga meranga toktepa sülen asayamung akokba atema tenüngsang agütsür," ta ashi.

"Team dak sendaka alir ajaki lenla ajak nung kanga junga shilem agiogo aser ita aika meranga renemba amajok masü. FIH Men's Hockey5s World Cup Oman 2024 nung

kanga junga asayatsü imlaja atar aser parnok maneni takok ngua aotsü imlar," ta Tirkey-i shisem.

Hockey India Secretary General Bhola Nath Singh-ia, "ni asayamung nung takok tajung ngutetba atema asayartem aser support staff tem nem tenüngsang agütsür. Iba takok tajung anguba sülen team-i linük ajunga nemadangkaktsüogo. FIH Men's Hockey5s World Cup Oman 2024 nunga linük nungi asayartemi India wako maneni temalen ajungkettsü ta temulung lema bilemer aser asayamung nung junga asayatsü imlaja atar," ta ashi.

India tebur Hockey team-i tanga asaya aliba ama maneni kanga junga asayayonga aotsü aser taruba küm Muscat nung Hockey 5s World Cup asayaba mapanga junga asayatsü imlar.

## Juan Mata Vissel Kobe nung denogo



**Rongjui/September 3, 2023 (Agencies):** Taoba mapang Manchester United aser Spain nunger midfielder Juan Mata Deobarnü Japan indang club Vissel Kobe nung denogo.

Mata ya 2010 küm Spain-i World Cup akokba team nung densema liasü aser pa Turkey club Galatasaray toktsüba sülen tang kobe nung denogo.

Iniesta, Kobe nungi küm pongu asayaba sülen July ita toktsüogo. Pa 2018 küm Barcelona nungi iba club nung dena liasü.

Iniesta Japan nung asayaba mapang J-League title ka danga

mekoktet, saka club nung denli nungi Mata takok marok angutsü nükjidong lir.

"Vissel Kobe atema mezüngbuba league koktsütsü nükjidong yur ni iba takok manok angutsü atema takok tashi team nem teyari agütsütsü," ta arishi küm 35 tain asayar yagi ashi.

Season tembangtsü atema asaya 10 dak tajemba anunga lia Vissel pur J-League nung defending champions Yokohama F-Marinos pur point ka agi memenepi tanabuba jenjang nung lir.

Iniesta-i 2019 küm Japan

indang domestic Emperor's Cup kokogo aser küm ka sülen pa lenisüba nung Vissel pur Asian Champions League semifinal tonga asaya liasü.

Iniesta aser Mata na indang teammate David Villa-a 2019 küm season ka atema Kobe nungi asaya liasü.

Mata-i ashiba agi, pai iba club indang tajung aika tenadang nungi angazükogo.

"Ni Vissel Kobe nung adenba atema kanga nemadanga bilemer. Iba club nung ni nükshia aliba asayar tajung aser medemer Andres Iniesta aser David Villa nata asayaogo," ta pai ashi.

"Ni iba linük nung parnok tsüngsü nung anidaktsü kanga nema danga bilemer," ta paisa shisem.

Mata Valencia nungi asayaba mapang nungtugu aküm aser 2012 küm Chelsea nungi asayaba mapang Champions League akok aser küm ana lir Manchester United nung aden.

Galatasaray toktsüba sülen pa team ka nung danga dena maliasü.


## Chennaiyin FC-i Thanglalsoun Gangte alizükogo

**Rongjui/September 3, 2023 (Agencies):** Chennaiyin FC-i Indian Super League (ISL) 2023-24 season metenzük tsüngda Manipur nunger lanur asayar Thanglalsoun Gangte den küm aika atema tenangzüktepa yangluogo.

Arishi küm17 tain asayar, shibai India U-17 team nungi asayaba mapang kanga junga asaya India nunger football asaya meimertem atsüa aruogo pa taküm Chennaiyin puri alizükba asayar 10buba kümogo.

Taoba küm SAFF U-17 Championship akokba asayamung nung Gangte-i tongtibang shilem agi aser pai goal pezü tashi idakja liasü aser ano taküm küm tetenzüklen AFC U-17 Asian Cup atema renemshiba mapang Real Madrid den asayadang pai asaya tatemtsü lia tongtibang goal ka idakja goal kasasa aküm.

Gangte ya India nung football asayar tajungtiba ka akümsü asoshi sempet lir aser Chennaiyin nung adenba ajanga pa sempet tali arantgetshitsü aser pa career renloka aotsü



asoshi teyari agütsütsü.

"Mezüngbuba nung ni Tsüngrem nem tenüngsang agütsür aser Chennaiyin FC-i kü dak tamang katetba atema kanga pelar. Tsüngremi dang mulungra iba club nungi ni otsü tasen aika yanglutsü yongya atar. Ni club tenüng nungi asayar dang masü saka ozü kibong, ozü nübürtem shirnok kidang timtemtepar parnok ajak tenüng nung nokdaker. Tsüngrem tajung lir," ta Gangte-i ashi.

Durand Cup nung quarter-final tonga asayaba sülen Chennaiyin pur head coach Owen Coyle lenisüba nung taruba ISL season atema renemdar.

## Nüngtugu Zimbabwe nunger cricket asayar Heath Streak süogo



**New Delhi, Rongjui/September 3 (Agencies):** Taoba mapang Zimbabwe nunger cricket asayar Heath Streak September 3 anepdang süogo. Pa asüba osang ya par kinungertemi lemsatepa liasü.

Pa asüba sülen kinungtsü Nadine-i social media nung la kinungbo bilemteta osang ka agüja liasü.

Streak-i, 1993 nungi 2005 küm tashi linük tenüng nungi Test 65 aser ODI 189 nung asayaogo aser international wickets 450 dak tema agiogo.

Streak, shiba Zimbabwe nunger bowler tem rongnungi ODI nung wicket 100 agiba mezüngbuba asayar lir, pai batting aser bowling naprongla kanga junga süa liasü. Pa ya

fast-medium bowler ka aser lower-order batsman ka liasü.

Maneni pa ya par linük nungi Test aser ODI naprongla nung wicket 100 agiba mezüngbuba asayar liasü.

Asaya nungi anenba sülen pa coach aküm aser team aser franchise balala den sensdaktepa aruogo. Pa Bangladesh national cricket team indang bowling coach liasü aser iba sülen team indang head coach aküm.

Ajisüaka pa ochi mashi inyakyim nung shilem agiba potetba sülen International Cricket Council (ICC)-i 2021 küm pa cricket dak sendakba inyakyim kecha nunga küm ti tashi shilem magitsü tenokdangba agüja liasü.

## BILEMDANGANG

"Pei tarutsüji peisasa yanglutsü."